

AGIRI BATERATUA. Gatazka larritzen duen «aurrekari onartezina» deritzote epailearen autoari agiria sinatu dutenek

Hainbat alderdi eta sindikatuk «larritzat» jo dute Garzonen autoa

Aralar, Batasuna, AB, Zutik, Batzarre, ANV eta LABek manifestu bat hitzartu dute

Humberto Unzueta | BILBO

Baltasar Garzon epailearen azken autoaren aurkako manifestu hitzartu dute hainbat alderdi politikok eta sindikatuk. Ebazpen judizialaren arabera, HB, EH eta Batasuneko 20 kidek gaur deklaratu behar zuten Espainiako Auzitegi Nazionalen inputatu gisa. Idatzia babesu dutenen irudiko, autoa «larria» eta «onartezina» da.

Manifestua atzo irakurri eta aurkeztu zuten, Bilbon eginiko prentsa agerraldian. Bertan bildu ziren idatzia babestu duten alderdi eta sindikatuak ordezkariek, hala nola Zutik, Aralar, Batzarre, Batasuna eta, Abertzaleen Batasuna alderdiak eta Eilas, Hiru, ESK, LAB, ELB eta EHNE sindikatuak.

Horiek guztiek elkartzeko eskubidearen eta ideien askatasunaren aurkako «erasoa» deritzote Garzonen autoari, eta helburu politikoa bati «erantzuten» diola berresten dute. Areago, gaine-

ratzen dute epailearen ekimena Madrilgo Gobernuaren «estrategia antidemokratikoarekin» bat datorrela eta oinarritzko eskubideak urratzen dituela.

Garzonen autoak inputatuen «babesik eza» bultzatzen duela salatu ondoren, manifestuak eranstean du euskal gizartearen zati handi baten erreferentzia politikoa «deuseztatzea» duela helburu gisa. Aurrekari «onartezina» iritzita, gatazka politikoren konponbidean lagundu beharrean, larritu egiten duela diote idatzia bultzatzen duten alderdi eta sindikatuak.

Joan den astean egindako kontaktuen ondorioz gauzatu da atzo aurkeztutako manifestua. Sustatzaileek EA, EAJ eta ELAekin ere izan dituzte harremanak, «jeltzaleak hasieratik desmarkatu ziren; EA eta ELA mamiarekin bat etorri ziren, baina beren aldetik aurkeztu nahi zuten beren iritzia». EAK herenegun agertu zuen bere iritzia gai horren inguruan.



MONIKA DEL VALLE / ARGAZKI PRESS

Besteak beste, Txutxi Ariznabarreta (LAB) eta Mertxe Colina (AB) izan ziren atzoko agerraldian.

IDATZIA

«Aurrekari onartezina»

Abertzaleen Batasuna, Zutik, Aralar, Batasuna, Batzarre, ANV-EAE, LAB, EHNE, ELB, ESK, Hiru eta Eilas alderdi eta sindikatuak sinatu dute ondoko idatzia:

«Agiri hau sinatzen dugunok, Espainiako Auzitegi Nazionalaren autoak eta zenbait herritarrek Madril deklaratutako beharrak, oinarritzko eskubide bat erasotzen duela uste dugu: elkartzeko askatasuna eta ideien defentsa.

1. Auto honek helburu politikoa argi bati erantzuten dio, eta bat egiten du Madrilgo gober-

nuaren estrategia antidemokratikoarekin, zeinak oinarritzko eskubideak urratzen dituen.

2. Erabateko babesik eza egoera sortzen du inputatuentzat.

3. Bere ondorioak euskal gizartearen oinarri zabal bati eragiten diote, eta era berean bere erreferentzia politikoa deuseztatu nahi zaio.

4. Aurrekari onartezina bat sortzen du, gatazka konponbidean lagundu beharrean, bere ondorioak larritzen dituena.

Honengatik guztiagatik, gure salaketarik gogorrena agertu nahi dugu auto eta eraso hauen aurka».

ELKARRI. Arriaga Antzokiaren aurrean bildu ziren iluntzean hainbat lagun



MARISOL RAMIREZ / ARGAZKI PRESS

Aniztasunaren alde

Elkarri gizarte mugimenduak elkarretaratzea egin zuten atzo arratsaldean Bilboko Arriaga Antzokiaren aurrean, «salbuespenik gabe, aniztasunaren alde». *Berdintasuna aukera politiko guztientzat lelo-*

arekin egin zuten mobilizazioa Elkarri-k, Garzonen autoa eta 20 lagunen inputazioa dela-eta. Epaile horren helburua alderdi bat jazartzea dela iritzi dio Elkarri-k. Prozesuak berme juridikorik ez duela esateaz gain, bakerako ez dela izango lagungarri uste du gizarte mugimenduak, eta aniztasuna beharrezkoa dela.

‘HERRIKO TABERNAK’. Helegitea aztertu dute

Kartzelan dauden bederatzi lagunek preso segitzeko arrazoiak ikusten ditu fiskalak

Axun Erzibengoa | DONOSTIA

Espainiako Auzitegi Nazionalen Zigor Arloko Lehen Atalak atzo aztertu zuen *herriko tabernen* aferari lotuta maiatzean espetxeratu zituzten bederatzi lagunaren espetxeratzearen kontrako helegitea. Enrique Molina fiskalak bederatziak espetxean jarrai dezatela eskatu zuen. Bere ustez, Baltasar Garzon epaileak kartzelatzeko erabili zituen argudioak nahikoak dira espetxean jarrai dezaten.

Apirilaren 29an atxilotu zituzten lagun horiek, eta Garzonek ETako kide izatea leporatu die, baita Gizarte Segurantzari iruzur egitea eta beste zenbait deli-

tu ere. Rufi Etxeberria, Jon Gorrotxategi, Joseba Garmendia, Juani Lizaso, Idoia Arbelaitz, Jaione Intxaurrea, Kike Alaña eta Patxi Bengoa eta Jose Luis Franco daude espetxean.

Defentsako abokatuak 9 lagun horiek preso jarraitzeko arrazoirik ez dagoela esan zuten. Jone Goirizelaia abokatuak EGUNKARIARI azaldu zionez, ezin da askatasuna bezalako eskubide bat murriztu akusazio zehatzik egin gabe, eta hori gertatu da. Bestetik, nabarmendu zuen fiskalak zera esan zuela: kartzelan izateko argudioak beste epaitegi batean agian ez luketela baliorik izango, baina Auzitegi Nazionalen nahikoa direla.